

Git mtu'ub Pabl ndo' bexa gezh Éfeso

Le'a Éfeso dub gezh nde to'o nitsdo'o, sa nat nibe'e nacion Turquía. Le'a Hechos 18 nsea 19 ndab le'a Pabl ngwa'yadi'izh di'izh ten Jesús ndo' be men sa wa. Le'a Pabl mke'a git ndee ndo' bexa gezh Éfeso zha na nkeanyaw xa nit len gezh Roma. No schon git mke'a xa zha wa, le'a ta wa Filipenses, Colosenses nsea Filemón. Le'a git Efesios nkeani'i be gealngea mas uzhe'eb nak cuent ten bexa nak xmen Cristo no xte'e uzhe'eb ta wen ndanno Dios bexa wa. Le'a tol git ndee nluu ta wen nya'an be xmen Cristo ndo' Dios. Le'a ta na li nak bexa wa dub ta lá yoo gan izhe'a, tal le'a xa uzhe'eb nge' ladna Dios natal ndidotsa. Le'a stol git ndee nluu le'a ta na li nak ta uzhe'eb wen wa, le'a be xmen Cristo nsabndo' gun ta nsak ladna Dios. Le'a capítulo 6 nkeani'i xte'e utsakndo' be xmen Cristo ndo' be juers ten ta ugap.

*Pabl nidi'izh ndo' be xmen Cristo bexa gezh
Éfeso*

¹ Le'a na' ndee Pabl, xa mtu'ub Dios gun na' ti'in ten Jesucristo. Nke'a na' git ndee ndo' bego ndencho Éfeso ba', bego umbi'i nak lado'o na ndo' Dios, no nge'ka ladna bega Cristo Jesús.

² Na'ab na' ndo' Tad Dios no ndo' Jesucristo Xwan

beuna utsin gak bexa ndo' bega no gun bexa wen yoo ladna bega.

Ta wen nsa'a Dios ndo' be xmen Cristo

³ Usa'a beuna xno ndo' Dios Xus Jesucristo Xwan beuna, le'a xa uzhebpa ndakno beuna, nsa'a xa be ta wen ten xa ta ncho gibe'a, ta na nak beuna xmen Cristo. ⁴ Le'a zha biseata gaknde'e gizhliyo le'a Dios mti beuna, ndontsa umbi'i gak beuna ndo' Dios, ni dub ke lá gap beuna. ⁵ Le'a ta na nkwea' ladna Dios beuna, ta we'e mbinbe'e xa mtu'ub xa Jesucristo ndontsa yak beuna xin xa. Le'a ta wa ta mbin Dios tiemp polta lak nsak ladna xa-yá. ⁶ Ta we'e gab beuna le'a Dios uzhe'eb dub xa wen, le'a xa uzhe'eb wen ndanno beuna nak xmen Cristo, xa na le'a Dios nkwea' ladna.

⁷ Le'a Jesucristo ulo'o beuna ndo' ta ugap, cha mtsu'u xa be ke ten beuna juers ten ta mtsi'i xa ten, gor na ngut xa ndo' cruz. ¡Le'a ta wa dub ta uzhebpa wen mbinno Dios beuna!

⁸ No uzhebpa msa'a Dios ta ndák beuna no ta nyakbe'ena beuna lak nak xa. ⁹ No msa'a xa ta ngondo' beuna dub ta uga'ach, ta mbinbe'e xa gun xa juers ten Jesucristo. ¹⁰ Le'a ta wa ta gun Dios zha nsabndo'ka li gun xa. Gal zha wa le'a Dios yunjunt itea be ta'a ndo' ya'a Cristo, lak be ta ncho gibe'a no be ta ncho ndo' gizhliyo.

¹¹ Le'a ta na nak beuna xmen Cristo, le'a Dios mti beuna ika'a beuna ta ndab xa usa'a xa. Le'a ta wa ta mbinbe'e Dios, xa na ndun itea ta na na' xa wenka nak. ¹² We'e le'a besa xa nak xa judio ngok besa xa ned mge' ladna Cristo, ndontsa gab besa le'a xa uzhebpa xa juert. ¹³ No liga

le'a bego mbi'ín di'izh gealngea ten Cristo, di'izh wen nsa'a gealnaban kub wa, cha mbingea ladna bega Cristo. We'e le'a Dios cha msa'a Espíritu ten xa ndo' bega, lakka ndab xa gun xa. ¹⁴ Le'a Espíritu wa dub sein, ta nluu le'a Dios sa'aka ta ika'a beuna, gal gor na mxa'akla Dios beuna ndo' be ta ugap. Ta we'e nsabndo' gab beuna le'a Dios uzhe'eb dub xa wen nak.

Pabl unab gakno Dios be xmen Cristo

¹⁵ Le'a na' ndee mbín xte'e nge' ladna bega Jesús Xwan beuna no xte'e nkwea' ladna bega itea be xmen Dios. Le'a ta na li wen ndun bega wa, ¹⁶ le'a na' gab ge'al nsa xno ndo' Dios cuent ten bega, no na'ab na' ndo' Dios gakno Dios bega. ¹⁷ Le'a Dios xa ndon le'a si'il nak, no nak xa Xus Jesucristo Xwan beuna. Ta we'e na'ab na' ndo' xa gak bega dub xa ndák nsea dub xa nyakbe'ena xte'e nak Dios. ¹⁸ No gun Dios yakbe'ena bega ta na mti Dios bega ndontsa gal uso' bega ta usa'a xa. We'e cha ini'í bega be ta uzhebpa chul usa'a Dios gal uso' beuna nak xmen xa.

¹⁹ No nlad na' ini'í bega xte'e uzhe'eb si'il nak juers ten Dios, ta na ndakno xa beuna ndangea ladna Cristo. Le'a ta wa le'aka juers ten Dios, ²⁰ ta mxiste Cristo ndo' gealgut, cha myatsob xa gibe'a wats Dios lad ga'al. ²¹ Mbin Dios le'a Cristo mas juert ndo' iteanak bexa ndap juers tal espíritu-yá natal men-a, tal nibe'e bexa nat natal tlaw inibe'e bexa. ²² Le'a Dios le'a mte itea be ta'a xan ndats Cristo inibe'e xa-yá. No mso' xa Cristo nibe'e xa ndo' beuna nak xmen xa. ²³ Le'a beuna nak xmen Cristo nak cuent ya'a xa nsea xo'o xa.

Le'a lak uzhe'eb nsa'a xa juers ndo' beuna, le'a juers ten xa ncho itea lad ndo' gizhliyo no gibe'a.

2

Dios nsa'a gealnaban ndo' bexa nge' ladna Cristo

¹ No ndo' bego msa'a Dios gealnaban, zha bi nak bega cuent dub xa ngut, zha ndun bega ta ugap no ndap bega ke ndo' Dios. ² Le'a tiemp we'e le'a bega utesea ndo' ta ugap lak ndesea be men ndo' gizhliyo. Mbin bega lak nlad maxu'u, xa nibe'e ndo' be mbi bxin no nki'il xa be men lá uxobgek bexa ndo' Dios. ³ Le'a polta le'a itea beuna li utesea, mbin beuna ta nladtsa beuna laktsa mbinbe'e beuna no laktsa ngol ladna beuna. Ta we'e le'a Dios ndi'izh utsaksi beuna lak ntsaksi xa itea be men ugap nak. ⁴ Ná le'a Dios uzhebpa mlats ladna beuna, no uzhe'eb mkwea' ladna xa beuna. ⁵ Ta we'e lak msa'a xa gealnaban ndo' Cristo, le'a xa no ndo' beuna msa'a-yá, zha na bi nak beuna cuent dub xa ngut ndo' Dios, ke ten be ta ugap ndun beuna. Le'a Dios nkwea' ladna beuna, ta we'etsa li msa'a xa gealnaban ndo' beuna. ⁶ No lak mxiste Dios Cristo, le'a xa no beuna mxiste, no msa'a xa sa isob beuna wats Cristo gibe'a. ⁷ We'e uluu Dios gal tiemp ilen wa xte'e ta uzhe'eb nkwea' ladna xa beuna no xte'e ta wen nak xa ndo' beuna nak xmen Cristo Jesús. ⁸ Le'a Dios uzhe'eb nkwea' ladna bega, ta we'e msa'a Dios gealnaban kub ndo' bega gor na mge' ladna bega Cristo. Le'a ta wa na'anpa juers ten bega, le'a ta wa ndi ta ga msa'a Dios ndo' bega. ⁹ Ta we'e na'anpa

izhinnona bega ta wa, le'a-yá na'anpa dub ta wen mbin bega. ¹⁰ Le'a Dios mbinde'e beuna no msa'a xa gealnaban kub ndo' beuna nak xmen Cristo Jesús, ndontsa ikesea beuna ndo' sbe'en be ta wen, lakka mbinbe'e Dios tiemp polta li gun beuna nat.

Dubtsa nak itea bexa nak xmen Cristo

¹¹ Le'a bego bexa na'anpa xa Israel, lá yalad bega le'a tiemp polta le'a bexa Israel mzhinna le'a bexa ncho be'e las bexa, ndab bexa le'a bega bexa na'anpa ncho be'e. ¹² Le'a zha we'e le'a bega lá nchando' Cristo, no na'anpa nak bega xmen Dios lak nak bexa Israel. Ta we'e na'anpa ndi'izh ika'a bega ta ndab Dios usa'a xa ndo' be xmen xa. Le'a bega ncho ndo' gizhliyo ndee, ná ni lá nkenkea' bega gakno Dios bega ni dub ta wen, no ni lá nchando' bega Dios. ¹³ Le'a polta le'a bega sit nak wats Dios, ná nat le'a bega dubtsa nak nsea Cristo Jesús no ubiila bega wats Dios ta na ngut Cristo ndo' cruz, mtsi'i xa ten wa.

¹⁴ Le'a Cristo mbin gan le'a besa xa judio wen nchono bego xa na'anpa xa judio. Mbin xa gan le'a itea beuna dubtsa nak, cuent mlate xa dub muro ncho tlaw itop xkwa'a beuna wa. ¹⁵ Le'a xa mnitndo' be ley ten bexa judio, be ta unibe'e Dios gun bexa wa, ndontsa dubtsa yak beuna nak be xmen xa, yá na'antapa gak beuna top xkwa'a men. ¹⁶ Le'a ta na ngut Cristo ndo' cruz, le'a itea beuna dubtsa nak, no wen nya'an beuna ndo' Dios. Yá na'antapa gakloo dub xkwa'a men ndo' stub xkwa'aga bexa.

¹⁷ Le'a Cristo mbi'id yadi'izh di'izh wen ná xte'e wen ya'an be men ndo' Dios, le'a bego bexa sit nak wats Dios, no besa xa judio bexa gax nak wats Dios. ¹⁸ Le'a juers ten ta mbin Cristo wa le'a besa xa judio no bexa na'anpa xa judio ndap beuna dubtsa Espíritu ten Dios, no syo'o gan ibii beuna wats Tad Dios.

¹⁹ Nat le'a bega yá na'antapa sit nak wats Dios, no na'antapa nak bega dub xkwa'a men xa'aga. Nat le'a bega no nak xmen Dios, no xin Dios nak bega. ²⁰ Le'a beuna nak be xmen Dios nak cuent dub ni'i mbinde'e Dios. Le'a ta nak xan ni'i wa, le'a ta wa bexa mtu'ub Dios gun bexa ti'in ten xa no bexa mbidi'izh sakndo' Dios. Le'a Jesucristo le'a nak ge' ned nbexan xan ni'i wa. ²¹ Lak le'a dub ge' ned wa ndun masis nak idub ni'i, no liga le'a Jesucristo ndun le'a be xmen xa dubtsa nak no nsayak kwa'ad bexa, gak bexa cuent dub ni'i umbi'i ten Dios. ²² Nat le'a bega no dubtsa nak nsea itea be xmen xa, nak beuna cuent dub ni'i sa ncho Espíritu ten Dios.

3

Pabl ngwa' ndo' bexa na'anpa xa judio

¹ Ta we'e le'a na' Pabl nkea litgi'ib ndee ta na ndadi'izh na' di'izh wen ten Cristo Jesús ndo' bego, bexa na'anpa xa judio. ² Le'a na' uní le'a bega mbi'ínla xte'e msa'a Dios ti'in ndun na' ndee ta gakno na' bega. ³ Le'a Dios mluu ndo' na' dub ta uga'ach ten xa, lak mke'ala na' ndido ta wa ndo' bega. ⁴ Le'a tal bega go'ol ta wa, we'e yakbe'ena bega plo nchando' na' ta uga'ach ten

Cristo wa. ⁵ Le'a polta le'a Dios na'anpa uluu ta uga'ach wa ndo' ni dub men, ná le'a nat le'a Espíritu ten Dios nluu-yá ndo' be apostol no ndo' be profet. ⁶ Le'a ta ndee ta uga'ach wa: le'a bexa na'anpa xa judio no gal uso' be ta wen ndab Dios gal uso'ka bexa judio, no dubtsa yak bexa nsea bexa judio, tal le'a bexa gungea ladna di'izh wen ten Cristo Jesús.

⁷ Le'a Dios utsin mbinno na', msa'a xa ta ndadi'izh na' di'izh wen ten xa wa, no nsa'a xa juers li ndun na'. ⁸ Le'a na' ndee ndon le'a lá nsak lat itea be xmen Dios. Ná le'a Dios mti na' gaa na' ndo' bexa na'anpa xa judio wa, gudi'izh na' di'izh wen ná xte'e usa'a Cristo uzhe'eb be ta wen ndo' bexa, dub ta lá yoo gan yakbe'ena beuna. ⁹ No ndab Dios gudi'izh na' ndo' itea be men xte'e ndun Dios ta uga'ach mbinbe'e xa wa. Le'a Dios xa mbinde'e iteanak be ta'a, mbinbe'e ta wa gast zha utexanta gizhliyo. ¹⁰ Le'a Dios li mchealte iteanak be xmen xa, ndontsa ini'í be angel no be espíritu nibe'e wa le'a Dios uzhebpa ndák itea be ta'a. ¹¹ Li mbin Dios lak ulo ladna xa polta, ta na nat mbin Cristo Jesús Xwan beuna cumplir. ¹² Le'a ta na nge' ladna beuna Cristo wa le'a beuna na'anpa izheb ibii beuna wats Dios, no uni'íka beuna le'a xa so'ónka ta inab beuna ndo' xa. ¹³ Ta we'e na'ab na' ndo' bega lá gach ladna bega maska nsati'id na' be gealkwea' ndee ke na ndadi'izh na' di'izh ten Cristo ndo' bega. Ndi bten ladna bega le'a ta na nsati'id na' wa ta gaknoka bega.

Uzhebpa nkwea' ladna Cristo be men

¹⁴ Le'a ke ten iteanak be ta wen nsa'a Dios wa, le'a na' nsaxib ndo' Dios Xus Jesucristo Xwan beuna, ¹⁵ xa le'a nak Xus iteanak xkwa'a be men, bexa ncho gibe'a no bexa ncho ndo' gizhliyo ndee. ¹⁶ Na'ab na' ndo' Dios le'a Espíritu ten xa gun juert gak lado'o bega, lak nsa'a xa sian be ta uzhebpa wen ndo' be xmen xa. ¹⁷ We'e le'a Cristo yoo len lado'o bego na nge' ladna xa, no ndo' itea be ta ndun bega ikwea' ladna bega be ltsa'a bega nsea yankea bega Dios. ¹⁸ No yakbe'ena itea bega nak beuna xmen Cristo ba' ná plo uxen no ko'ol no wat no ga'ap nak ta uzhe'eb nkwea' ladna Cristo beuna. ¹⁹ Le'a na'an ton yoo gan yakbe'ena idub ta na nkwea' ladna Cristo beuna. Ná le'a na' na'ab ndo' Dios le'a bega mas igondo' ta wa ndontsa gak bega lak nak Dios.

²⁰ Le'a Dios ndap juers gun xa itea be ta'a mas uzhe'eb ndo' lak inab beuna ndo' xa no lak yakbe'ena beuna. Le'a juers ten Dios wa le'aka juers ncho len lado'o beuna. ²¹ ¡Idub tiemp gab beuna le'a Dios uzhe'eb dub Dios si'il, geal ta wen ndun be xmen xa no Cristo Jesús! Lika nak-a.

4

Dubtsa Espíritu ten Dios no'o be xmen Cristo

¹ Le'a na' nkea litgi'ib ndee ke na ndun na' ti'in ten Cristo. Nat ndáp na' ndo' bega utsin bin bega lak nsabndo'-yá, le'a Dios le'a mti bega. ² Bcha'an gok bega no lá gunbe'e bega le'a bega mas nsak ndo' be ltsa'a bega. Bxik bega ndo' bexa, ta na nkwea' ladna bega bexa. ³ Le'a Espíritu ten Dios myunno bega dubtsa xkwa'a be

men. Ta we'e utsin gak bega ndo' be ltsa'a bega, ndontsa na'anpa iteltsa'a bega. ⁴ Le'a beuna nak xmen Cristo dubtsa nak beuna, no dubtsa Espíritu ncho lado'o beuna, no dubtsa mti Dios beuna nkenkea' beuna gal uso' beuna ta usa'a Dios. ⁵ No dubtsa xa nak Xwan beuna, nsea dubtsa xa nge' ladna beuna, nsea dubtsa ntalea' beuna ta na nak beuna xmen Cristo. ⁶ No dubtsa Dios Xus itea beuna, xa na le'a nibe'e itea beuna, no nso' xa wats itea beuna, no ncho xa len lado'o itea beuna.

⁷ Ná le'a lak nlad Cristo le'a xa msa'a juers ndo' kadga dub beuna gun beuna dub ti'in ten xa. ⁸ Le'a di'izh ten Dios nkeani'i ndab:

Le'a gor na mkea xa ga'ap,
le'a xa mbi'i bexa na mbin xa gan ndo' na.
No msa'a xa be ta wen ndo' be men.

⁹ Le'a ta na ndab “mkea xa ga'ap” wa, ¿lid gab ta wa zha le'a xa ned ula' sa mas wat ndo' gizhliyo? ¹⁰ Le'a Cristo xa na ula' ndo' gizhliyo wa le'aka xa mkea sa mas ga'ap ndo' gibe'a ba', ndontsa yoo xa itea lad guni'i pa-yá. ¹¹ Le'a Cristo le'aka msa'a juers ndo' pla bexa gak apostol gun ti'in ten xa, no pla bexa gudi'izh sakndo' Dios, no pla bexa gudi'izh di'izh wen ten Cristo, no pla bexa gak pastor yansu be xmen xa, no stapla bexa gak mech uluu di'izh ten xa. ¹² Ta we'e nsu'u beuna gun beuna ti'in ten xa, ta ndakno beuna be ltsa'a beuna nak xmen Cristo, ¹³ gast gal zha na dubtsa ige' ladna beuna Cristo no dubtsa igondo' beuna Xin Dios. Le'a zha wa le'a beuna ga'al gak ndo' Dios, lakta nak

Cristo. ¹⁴ Le'a beuna yá lá gakta lak nak dub me'ed ndanbe'e dub ta'a cha tso'o wa stubga ta'a. Na'anpa ula'a beuna ukwi'inno be men beuna, bexa ndadi'izh cuent uzhe'eb ta wen, parea le'a ta wa na'anpa le'a nak. ¹⁵ Ndi sbe'en gealngea gudi'izh beuna no ikwea' ladna beuna be ltsa'a beuna, ndontsa mas isayak beuna lak nak Cristo, xa nibe'e ten iteanak beuna nak xmen xa. ¹⁶ Le'a Cristo ndun le'a iteanak be xmen xa dubtsa nak, no ndakno xa gun beuna ti'in lak nsabndo' gun kadga dub beuna, ndontsa juert gak beuna no mas ikwea' ladna beuna be ltsa'a beuna.

Xte'e nsabndo' yoo bexa nak xmen Cristo

¹⁷ Le'a ta ndee ndáp na' no nibe'e na' ndo' bega sakndo' Cristo: yá lá gakta bega lak nak be men lá nchando' Dios, le'a bexa ndesea ndo' be ta na'an xti'in laktsa ndanbe'e bexa. ¹⁸ Lá nyakbe'ena bexa xte'e nak Dios no ngud nak lado'o bexa. Ta we'e sit nak bexa wats Dios, le'a bexa lá ini'í ti ndencho bexa ndo' be ta ugap. ¹⁹ Le'a bexa wa yá lá ndonota ladna be ta ugap ndun xa. Ndi ndun bexa sbe'en ta ugap ta ndaltsa ladna bexa, no nkwa'an bexa mas sianta be ta bzhi'ik li gun bexa.

²⁰ Ná le'a bexa na mluu di'izh ten Cristo ndo' bega wa na'anpa ngab li gak bega. ²¹ Le'a na' uní le'a bega mbi'ínla di'izh ten Cristo no nchando'la bega gealngea ten Jesús. ²² Ta we'e lá gakta bega be ta ngok bega polta, zha biseata yak bega xmen Cristo. Yá lá gunta bega laktsa nlad bega, ta nsak bega ta wen ná le'a ta wa ndi ta ugap. ²³ Ndi bla'a bega uche'a Espíritu ten Dios ta ncho lado'o bega no ta ndanbe'e bega. ²⁴ Cha gok bega cuent

dub men kub lak nlad Dios gak bega: umbi'i gak lado'o bega no ga'al gak bega ndo' Dios lak ndab gealngea ten Dios.

²⁵ Ta we'e bla'a bega be gealkwi'in, ndi bidi'izh bega sbe'en ta ugea ndo' be ltsa'a bega, geal le'a itea beuna dubtsa xkwa'a men nak.

²⁶ Tal le'a bega gakloo ndo' dub men, na'anpa gunno bega xa dub ta lid le'a nak. Ndi byalad bega ta ndakloo bega wa bi le'a wizh wa, ²⁷ ndontsa lá ula'a bega utsabgix maxu'u bega.

²⁸ Tal ncho bega ndun gealwa'an, yá lá gunta bega ta wa. Ndi utsin bin bega ti'in lak nsabndo'-yá, natsa gap bega ta usa'a bega ndo' bexa nki'in-a.

²⁹ Ni dub ta usalad lá gudi'izh bega. Ndi sbe'en ta utsin bidi'izh bega, ta na sakno xa na go'ón-a.

³⁰ Lá gun bega ta ndun uban yoo ladna Espíritu ten Dios. Le'a Espíritu wa cuent dub sein, ta nluu le'a beuna xinka Dios, no gal wizh ko'o xa beuna ndo' be ta ugap.

³¹ Bla'a bega ta nxee ladna bega, no ta ndakloo bega, no ta ugi'ige'a bega, no ta ugi'i ní'i bega, no ta nisi bega be men, nsea iteata be ta ugap.

³² Ndi utsin gok bega ndo' be ltsa'a bega, no bkwea' ladna bega bexa, no bing'e' ladna bega ndo' bexa, lak ndange' ladna Dios ndo' bego nak xmen Cristo.

5

Xte'e nsabndo' ikesea be xin Dios

¹ Le'a bega xin Dios no nkwea' ladna xa bega. Ta we'e bin bega juers gak bega lak nak Dios.

² Ndo' itea be ta ndun bega bkwea' ladna bega

be men, lak nkwea' ladna Cristo beuna no msa'a xa le'aka le'a xa ngut sakndo' beuna, cuent dub xnab uzhebpa nsak ladna Dios.

³ Le'a bega nak be men umbi'i ten Dios, ta we'e ni dub be ta ndee lá nsabndo' yoo lat bega: lá ugal bega dub xagots na'anpa xagots ten bega, no lá gun bega be ta ugap ltsa'a ta wa, no lá isa'ab ladna bega be ta ndap stubga men. ⁴ No lá gudi'izh bega be ta ugap nak no be ta na'an xti'in no be ta bzhi'ik, le'a be ta wa na'anpa nsabndo'. Mas utsin ndi bsa'a bega xno ndo' Dios be ta ndun Dios. ⁵ Le'a bega uni'íka le'a bexa ngal dub xagots na'anpa xagots ten xa no bexa ndun be ta bzhi'ik ltsa'a ta wa, le'a bexa wa na'anpa yate sa nibe'e Cristo no Dios. No bexa sbe'en nlad mas sian ta'a gap lá yate sa nibe'e Dios, le'a xa wa lá ndankea Dios le'a xa ndi ndankea be ta ndap xa wa. ⁶ Lá ula'a bega uki'il stubga men bega gun bega be ta ugap wa, le'a Dios utsaksi bexa na lá nxobgek ndo' xa. ⁷ Lá uchealtsa'a bega bexa li nak wa.

⁸ Le'a polta le'a bega ngok bexa ndesea cuent sa ukaw. Ná nat le'a bega ndi ndesea ndo' xe'a ten Dios, ta na nak bega xin Dios. Ta we'e gok bega lak nak dub xa nkesea ndo' xe'a. ⁹ Le'a tal ton nkesea ndo' xe'a ten Dios, le'a xa wa nkwea' ladna be men, no utsin nak xa, no gealngea ndadi'izh xa. ¹⁰ Bin bega juers gun bega be ta isak ladna Dios. ¹¹ No lá gun bega be ta na'an xti'in lak ndun bexa nde sa ukaw. Ndi gud bega ndo' bexa le'a ta ndun bexa wa na'anpa le'a nak, ¹² le'a be ta xga'ach ndun bexa wa dub ta udalad gudi'izh beuna. ¹³ Ná le'a sa ncho xe'a le'a itea

be ta ugap ndun bexa wa cha nluu, le'a ndo' xe'a ten Dios nluu iteanak be ta'a. ¹⁴ Ta we'e lnde'e ndab be men:

Utsin binbe'e, lu nak cuent dub xa naxyats.
No lá gakta lu cuent dub xa ngut,
le'a Cristo usa'a xe'a ten na ndo' lu.

¹⁵ Ta we'e uzhebpa bla'ach bega xte'e gak bega. Lá gak bega lak dub xa lá nsakyo'ón di'izh, ndi gok bega dub xa utsin ndanbe'e. ¹⁶ Itea gor sbe'en ta wen gun bega, le'a tiemp ndee uzhebpa ugap nak be men. ¹⁷ No lá gak bega dub xa lá nsakyo'ón, ndi bkwa'an bega xte'e nlad Dios gun bega. ¹⁸ No lá gun bega gealgu, le'a ta wa go'o bega ndo' sian ta lá nsabndo'. Ndi bla'a bega le'a Espíritu ten Dios go'o bega ndo' ta wen. ¹⁹ Le'a gor na nyakjunt bega no be ltsa'a bega, idub ncho ladna bega bilto'o bega be salmo no be himno no be cant ndo' Dios. ²⁰ No bsa'a bega xno ndo' Tad Dios guni'i xta'an nsatid bega, ta na nak beuna xmen Jesucristo Xwan beuna.

Xte'e nsabndo' gak be xagots ndo' xabgi'i ten na

²¹ Lak ndap bega mod ndo' Dios, liga gop bega mod ndo' be ltsa'a bega. ²² Le'a bego be xagots nsabndo' uxobgek ndo' xabgi'i ten bega, lak nxobgek bega ndo' Cristo. ²³ Le'a be xabgi'i nak xa nibe'e ndo' xagots ten na lak nibe'e Cristo ndo' be xmen na, no ngo'o Cristo bexa ndo' be ke ten bexa. ²⁴ Ta we'e lak nxobgek be xmen Cristo ndo' xa, no liga nsabndo' uxobgek be xagots ndo' xabgi'i ten xa.

Xte'e nsabndo' gak be xabgi'i ndo' xagots ten na

²⁵ Le'a bego be xabgi'i, nsabndo' ikwea' ladna bega xagots ten bega, lak uzhe'eb nkwea' ladna Cristo beuna nak xmen xa, gast msa'a xa le'aka le'a xa ngut xa sakndo' beuna. ²⁶ Li mbin Cristo ndontsa utsambi'i xa lado'o beuna nsea di'izh ten xa, lak nsat men dub ta'a no nits. ²⁷ We'e gal gor kwe beuna ndo' Cristo, le'a beuna uzhebpa chul no umbi'i nak ndo' Dios, ni lá ndap beuna ni dub ke no ni dub ta'a lá utsin nak, cuent dub lad umbi'i ndon lan nak, no ni dub mek na'an las-a.

²⁸ No liga le'a bego xabgi'i, lak nkwea' ladna bega le'aka le'a bega, no liga bkwea' ladna bega xagots ten bega. Le'a tal ton ikwea' ladna xagots ten na wa, le'a xa wa noga ikwea' ladna le'aka le'a xa. ²⁹ Le'a na'an ton nxeeno ladna le'aka le'a na. Le'a xa ndi wen nla'ach le'aka le'a xa no nkeno xa le'aka xa, lak nla'ach Cristo be xmen xa, ³⁰ geal le'a itea beuna dubtsa nak nsea Cristo, cuent nak be'al las xa no tit ten xa. ³¹ Lak nkeani'i di'izh ten Dios, ndab-a: "Ta we'e ula'a xabgi'i xus na nsea xna'a xa, cha ika'a xa xagots ten xa. Le'a cuent ten Dios le'a itop xa wa yak dubtsa men." ³² Le'a ta nkeani'i wa bid nyakbe'ena beuna, parea le'a na' ndáp ta ndee cuent ten Cristo nsea iteanak beuna nak xmen xa. ³³ Ná le'a ta wa no gab le'a be xabgi'i nsabndo' ikwea' ladna xagots ten na lakkata le'aka xa, no be xagots nsabndo' gap mod ndo' xabgi'i ten na.

Xte'e uxobgek be me'ed no xte'e gun xus be me'ed

¹ Nat le'a bego be me'ed no bexa ben, bxobgek bega ndo' xus bega nsea ndo' xna'a bega ta na nak bega xmen Cristo. ² Le'a lat itea be ta'a unibe'e Dios, le'a ta ndee ta ned ndab Dios wen gunno xa bexa na li gun wa, ndab-a wankea bega xus bega nsea xna'a bega, ³ ndontsa wen yoo bega no sian li'in iban bega ndo' gizhliyo ndee.

⁴ Le'a bego ndap xin na, lá gun bega ta gakloo bexa ndo' bega. Ndi utsin binga'al bega bexa, no bluu bega bexa, no btenxe'a bega bexa lak nlad Cristo Xwan beuna gak bexa.

Bexa ndun ti'in ten stubga men

⁵ Le'a bego na ndun ti'in ten stubga men, bxobgek bega ndo' xwan ti'in wa, lak nxobgek bega ndo' Cristo. No gop bega mod ndo' bexa idub ncho ladna bega. ⁶ Utsin bin bega ti'in ten xa idub tiemp, na'anpa nabtsa gor nso'wi'i xa lak ndun bexa nlad wen ya'an xa ndo' be mentsa. Ndi bin bega ti'in ndo' xa idub juers ten bega lak nlad Dios, cuent dub gor ndun bega ti'in ndo' Cristo. ⁷ Bin bega ti'in ndo' bexa wa idub ncho ladna bega, cuent ndo' Cristo na'anpa ndo' men wa-yá. ⁸ Le'a bega uni'í le'a Cristo kix ta wen ndun itea be men, guni'i tal xa ndun ti'in ten stubga men natal na'an.

⁹ Le'a bego na ndap xa ndun ti'in ten bega, no liga utsin gok bega ndo' bexa wa. Lá gun bega ta izheb bexa ndo' bega, geal le'a bega uni'íka le'a dubtsa xa nibe'e ndo' bego no ndo' bexa wa, le'a

ta wa Cristo xa nsob gibe'a. Le'a xa wa na'anpa nti be men.

Be ta nsa'a Dios utsakndo' be xmen na

¹⁰ Bego nak beuna xmen Cristo, nat bkwa'an bega ta gun juert gak lado'o bega, ta usa'a Dios ika'a beuna nak xmen xa. ¹¹ Binti'in bega itea be ta nsa'a Dios utsakndo' bega, ndontsa ga'al kwe bega ndo' be ta nlad maxu'u ukwi'inno bega. ¹² Le'a beuna na'anpa ndeyono be men, le'a beuna ndi ndeyono be mbi bxin nibe'e. Le'a ta wa be mbi bxin nibe'e ndo' gizhliyo ukaw ndee, no be mbi bxin ndesea ndo' mbi. ¹³ Ta we'e binti'in bega itea be ta nsa'a Dios utsakndo' bega, ndontsa gun bega gan zha na ilen be ta ugap. We'e gor utidla itea be ta ugap wa, le'a bega dubtsa nso'.

¹⁴ ¡Ta we'e dubtsa ute bega! Sbe'en geal-gea bidi'izh bega, le'a ta wa cuent dub sinch ndanti'in dub soldad. No sbe'en utsin bin bega, le'a ta wa cuent dub ble'a gi'ib ntsaw dub soldad lado'o na. ¹⁵ No bidi'izh bega di'izh wen ten Cristo ta ndun wen ya'an be men ndo' Dios, le'a ta wa cuent nke'a dub soldad ndab na. ¹⁶ No mas bge' ladna bega Cristo, ndontsa lá ukedino maxu'u bega, lak dub ble'a gi'ib nsén dub soldad ntsaw ndo' be flech nsob beal'. ¹⁷ No btse'a ladna bega le'a Dios msa'a dub gealnaban kub ika'a beuna, le'a ta wa cuent dub xo gi'ib ncho gek soldad. No binti'in bega di'izh ten Dios, ta na msa'a Espíritu ten Dios, le'a ta wa cuent spad ten soldad.

¹⁸ Bidi'izhno tse'e bega Dios. No unab bega ndo' Dios lak nluu Espíritu ten Dios bega. No

list ute bega, no ni lá gach ladna bega, no unab bega gakno Dios itea bexa nak xmen Cristo. ¹⁹ No unab bega ndo' Dios usa'a Dios be di'izh gudi'izh na', ndontsa na'anpa izheb na' gudi'izh na' be ta uga'ach ten Dios, le'a ta wa di'izh wen ten Cristo. ²⁰ Le'a Dios mtu'ub na' gudi'izh na' ta wa, no ke we'e nkea na' litgi'ib ndee. Unab bega ndo' Dios gakno xa na' gudi'izh na' di'izh ten Dios lak nsabndo' gudi'izh na'-yá, na'anpa izheb na' ndo' be men.

Be ta lult mke'a Pabl

²¹ Le'a Tíquico amig ten na', xa no nak xmen Cristo no utsin ndun xa ti'in ten Dios, le'a xa wa gab ndo' bega xte'e ncho'o na' no xta'an ndun na'. ²² Le'a na' ntu'ub xa ndo' bega, gudi'izh xa ná xte'e ncho besa no utenxe'a xa bega ndontsa na'anpa yu' ladna bega.

²³ Nat na'ab na' ndo' Tad Dios no ndo' Jesucristo Xwan beuna, gun bexa wen yoo ladna bega nak xmen Cristo. No usa'a xa juers mas ikwea' ladna bega be ltsa'a bega, no mas ige' ladna bega Cristo. ²⁴ No mas uzhe'eb utsin gunno Dios itea bexa na lá nla'a ta na ndankea bexa Jesucristo Xwan beuna. Lika gak-a.

**Be di'izh nsa'a gealnaban
Zapoteco, San Vicente Coatlán: Be di'izh nsa'a
gealnaban New Testament**

copyright © 2015 Wycliffe Bible Translators, Inc.

Language: Zapotec, San Vicente Coatlán

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Dec 2022 from source
files dated 29 Jan 2022

21c20591-ea7e-5ff5-b188-539398faf46d